

ASSESSORATO ALLA CULTURA
BIBLIOTECA CIVICA SIMPLICIANA

**PREMIO LETTERARIO
CITTÀ DI OLBIA
III^a EDIZIONE**

POESIE IN GALLURESE E LOGUDORESE

ANTONIO SANNIA

NON T'ADDURES MUDA

PRIMO CLASSIFICATO

Biblioteca Civica SImpliciana 0789/26710, 0789/25533

bibliotecasimpliciana@comune.olbia.ot.it - <http://bit.ly/biblolia> - social network: @bibliotecaolbia

“Non t’addures muda”

1° PREMIO **NON T’ADDURES MUDA** – Antonio Sannia – Bortigali

Su giogu ‘e s’amore, sas isperas, su gosu e.i su cras che paren imbolados in mesu ‘e sas roccas pistas dai su trainu aundadu.

Ruttos sos sentidos, perdidos sos isettos, fuidas sas luguras, paret chi su chelu nde siat torra in terra...

Su poete ispinghet sa mama noa a nde pesare sos ojos dai su ludu.

A no istare a sa muda: sa fruttu nèbida de s’amore pèdidu attit boza ‘e cantare e torrat su risittu a sas laras de sa mama noale.

La commissione

Alberto Capitta

Antonio Canalis

Maria Teresa Inzaina

Natalino Piras

Quintino Mossa

Non t'addures muda...

Carigna cussu frore,
chi giughes in su sinu,
e non contes sas fozas chi sun bruttas
de penas e dolore,
chi calan che trainu,
in mesu 'e pedra siccas e dirruttas,
chi ligan chelu 'e terra,
su sàmbene e su mele in custa gherra.

Cussa carre nuscosa,
chi deris fit disizu,
como est solu mudore, est che presone;
fritta comente losa,
ch'inserrat cussu lizu,
semenadu po giogu e passione,
in terra fuliada,
che tula 'e froes in sa contonada.

De sàmbene est mudadu,
su pettus biaittu,
paret chi b'epat nàschidu una rosa;
una manu at pintadu,
po custu tempus frittu,
ateru 'estire ruggiu po s'isposa,
raida 'e milli isperas,
boladas, chena nudda, in sas aeras.

Como t'an ispozadu,
in mesu a su laore,
manos pedrosas, fattas de luzana;
e rutta t'at lassadu,
carre 'e pagu valore,
cussu abbramidu, zegu da' sa gana
e de su pettus brama;
...ma est s'amore chi t'at fattu mama.

Mancari isculza e nuda,
non finas de ballare,
in mesu 'e s'erba frisca de s'albore;
e non t'addures muda,
si tenes de cantare,
cun su risittu in laras, de s'amore.
E cando ses pranghinde,
siat po gosu e non ca fis patinde.